

南昌府志卷四

建置二

官署

巡撫部院署在南昌縣地方東西大街中明寧府子城內前宮遺址也先是明正統間鎮守都御史署在東湖上貢院之左卽故南昌道以待刷卷清軍分巡之所其堂名正心堂西爲後樂亭後鎮守不常設署廢至嘉靖三十二年併入貢院成化間巡撫都御史署在永寧寺鐘鼓樓之右都御史閔珪居之正德十五年巡撫都御史王守仁以舊院地處僻隘兩司議政亦遠於是布政司陳策按察司伍

南昌府志

卷四

建置

文定合議逆濠承奉司一所地勢規模頗高廣呈奉巡撫衙門詳允卽其地建巡撫署迤北爲提學署尋奉裁巡撫署遂改爲巡按察院嘉靖十七年復設巡撫都御史胡岳卽舊提學署改建撫院公署正中爲表正堂東爲友士軒後爲虛受堂東西俱衙廨西南有清風亭演武亭儀門東爲旗纛廟又前爲院門門外兩翼爲各屬茶廳前爲雄藩節鎮坊外有屏牆坊左右爲轅門

羅欽順有記

國朝巡撫仍駐節於此順治九年巡撫錦州蔡士英捐俸佐以

贖鍰拓地庀材因舊而重新者四重創建者亦四重

熊文

舉有記陳宏緒有記

康熙二十七年巡撫王隲奉

聖祖仁皇帝上諭從容安靜為上六字製額懸供三十八年

御書老成清望匾額賜巡撫馬如龍四十二年二月

御書擁節名疆匾額賜巡撫張志棟四十六年四月

御書布澤西江匾額及政敷匡岫春風滿惠洽鄱湖澍雨多聯句

賜巡撫郎廷極五十四年

御書寵任麾鉞匾額及擁麾南國稱雄鎮開府長江控上游聯句

賜巡撫佟國勳五十六年

御書誠信開府匾額及馭吏當持法安民祇要廉金章紫綬旌循

吏甘雨和風祝有年二聯賜巡撫白潢鈎摹敬懸大堂乾

隆三年巡撫岳濬於內署東建升觀樓十八年巡撫鄂容

南昌府志

卷四

建置

二

安修署前牌坊改雄藩節鎮枋為文武為憲二十八年護

巡撫湯聘建遮風樓增升觀樓為三層三十年巡撫明德

修葺大堂轅門頭門儀門東西書房三十五年巡撫海成

修理箭亭四十二年巡撫郝碩修理科房四十九年升觀

樓燬於火五十二年巡撫何裕城重建改額三星樓省志新增

明羅欽順記曰嘉靖十七年十月有二月甲寅望江西改建

行都察院成惟時右副都御史浦南胡公實奉璽書撫臨

茲地文武僚屬遂以日奉迎繁戟奠厥攸居百度一新興

情咸悅於是左布政使夏君邦謨按察使尹君嗣忠都指

揮僉事張君鯨與諸司官合謀宜有記述以垂久遠乃以

書來告曰江西會城舊有行都察院三所其一乃正統間

撫臣所建後為鎮守太監府其一成化間撫臣所建遭宸

濠之亂而廢其一乃正德末年撫臣所建今為行按御史

察院嘉靖初嘗罷撫臣不遣既而復置則前政所居御史

奉有成命矣時鎮守已革因即其府為行院居之爰及今

年而鎮守亦復邦謨等初聞報見公亟請所處公曰府為鎮守舊物且嘗經奏請不可更昔人之所廢者其必有見無容復外此將無善地乎僉曰提學之署高而顯厥且當藩臬之中將圖改建地無善於此者署北尚多隙地移其署而置之稍北亦罔弗宜公曰善乃興事此其興廢遷改之本末也興事七月十一日為屋凡百餘間左為寢堂以聽政前後皆五間中為川堂其前為儀門亦五間又前為大門間殺其二列卒之廡間十六居吏之舍間十三栖卷之舍間七皆附於堂寢以宴息前後亦皆五間中為角榭庖福庫廡合十五間皆一殿其前作亭一區以待賓客大門之內有土神之祠外臨通衢表以棹楔中左右各一三司之暫憩有館凡諸屬吏來俟進止者皆有所庇之廬體勢崇嚴品式具備所用木石瓦甃韋鐵竹葦丹漆之類費金凡二千五百有奇人夫匠作為力凡二萬一千有奇金取諸贖刑之餘力均諸里役與卒之義者公明無遺照指授規畫動適幾宜故歷日僅百五十有奇遂克臻於完美役鉅而費省功倍而民不勞此則今茲勦造之凡也願得一言以鐫諸石庶永永有徵先生宜勿拒欽順不敏竊觀公之是舉有三善焉其待物也公其決幾也果其用財也節蓋凡爾綸庶務鮮不由此是宜風紀振肅大小歸心

今上親

國朝熊文舉記曰

嘉績之成如種斯獲其於聖天子倚任之重諒無負哉諸君謀議克諧贊襄有恪皆所以為一方久遠之計協恭之美又於是乎在皆所宜書公名岳字仲申華亭人

國朝熊文舉記曰
 今上親政之次年歲在壬辰少司馬大中丞蔡公以
 府江西閱兩年政治肅清賦蠲而核吏潔而和兵整而恬
 民安而阜上下雍睦四境喁喁山高水深陶然化國先是
 都察院有公署疊經變亂苟且相仍等於蓬廬莫之葺治
 大中丞至或寓紳士之居鼓角雖嚴規模不立公見之曰
 是相臺也總持風紀貞肅官僚皆於是乎在何至窳陋若
 此會江西盤錯杳乘諸艱蝟集公日拮据焦勞吏治民隱
 不暇甲午春公始率藩臬諸大夫郡邑有司戎幕叅遊相
 度舊行臺升高望遠俯勝測奇撤其壅蔽斥其菲陋廓其
 湫隘規方審勢一切鼎而新之有門鏘鏘有堂翼翼堂之
 後有川堂有燕寢計再重備極高明整潔後有樓巍然厥
 豁憑欄四眺覽曠無遺旁及射圃庖福之所罔不周隆外
 而事神寅賓之堂俱歸整肅計所用木石竹葦劈鍤丹漆
 及雇募人夫匠作等約費金數千有奇皆公自捐俸薪贖
 金纖毫不擾於民間負擔不呼之力役公復指示有方區
 畫有緒故為時僅百有餘日遂臻厥成壯哉觀也不佞文

舉蓋嘗遊覽縱步而歎大中丞之爲此也有四美焉以言乎天時則適當營建之候湖東西巨孽就殄七八年通賦全蠲桴鼓無驚謳歌載道以言乎地利舊旣當藩臬之中新復闢四道之路後屏不苦於局促兩翼遂覺其稽如以言乎其物曲則美材在遠而畢集文石擇近而咸齊捷若神翰敏如夙構以言乎人情共覆胥乎仁天快瞻依乎德字無煩馨鼓爭效抹陬夫君子一舉事而四美俱備是不惟可法兼亦可傳吾慶江右之民公且將盡納之春臺登之衽席是役也公不獨享其攸躋攸寧而與江民共適於美輪美奐吾見堂階之下其願稱兕觥而祝萬壽者恨不踵相接也諸藩臬大夫郡邑有司稟公法程奉公憲度登斯堂也蓋豸府驄威之凜凜焉夫吏治肅民生安公本此以制作經營實垂不朽文舉席庇蜚鴻歡同賀燕以叅戎趙君業隆遵董斯役請文鐫石因不揣蕪鄙樂得次第而紀載之蔡公名士英遼東錦州人以都察院協理院事左副都御史陞兵部右侍郎都察院左副都御史巡撫江西陳宏緒觀德堂記曰少司馬錦州蔡公奉命撫綏江右載閱寒暑仁以樂育義以匡定禮以勸誘濯磨而本之以中孚出之以濟哲諸所創制垂法悉爲無窮之規十

命撫綏

南昌府志

卷四

建置

四

膏澤雨暘時若庶草蕃庶羣抃舞而歌大有於郊原於是公進諸大夫而詔之曰是百堵具興之日也乃相舊基而增拓之捐清俸暨贖鍰凡數千金不煩列屬不擾閭閻俄頃而工師告成殖殖噲噲若昔人所詠者靡不兼備復於公署之西卽演武亭故址而益加廣繚以周垣爲韎韐附注與材官騎卒校射之堂顏其堂曰觀德公時輕裘緩帶訓於其間恩威所被遐邇懾服未幾總督漕儲需人在廷以三大臣列名奏請

特簡公

無難於重任僉曰公之宏猷駿望無難於艱危之江右則益室肖像或謀摩崖鐫功或謀颺言頌德而公環顧校射之場不忘夙昔鼓鞀之聽屬中權趙君命小子宏緒爲之記宏緒作而歎曰大哉公之名斯堂也語有之德成而上藝成而下昔之人張鵠設乏有其度大侯參干有其程司士司正量人樂人有其官執弓挾矢見鏃鉤弦有其法決遂旌福中籌豐爵有其器奇純左右有其筭若者豈徒以藝相角逐而已哉將導之進退周旋俾其咸中於禮約之於內志正外體直俾其勿以悍勇而見其長也孔子射於矍相之圃觀者如堵矍子路執弓矢延之而去之者半公罔之裘揚解語之而去者又半序黠又揚解而語之僅有

存者射之難也如是非射之難而觀德於射之難也然則公之命名之意遠矣江右固處弱勢賴公訓練而一變為強又賴公訓練而強者一變而不屑以悍勇見長咸中於禮今行於國中所遇執鞭弭而屬橐鞬者有揖讓之容無器凌詬諄之習有稱物平施之雅無搶攘爭奪之風則公之德化實使之詩云文武吉甫萬邦為憲其公之謂與山高水長細柳之營何異蔽芾之樹記之以示勿諼也明巡撫夏良勝題名記曰國家所稱持綱肅紀提衡大小文武吏惠養元元遏亂略以保固疆圉則撫臣重大江以西控吳楚閩越之衝彈壓諸郡國盤石宗城而襄治安以視他藩省則又重按合甲以工部侍郎巡視自文皇帝十九年始成宣而後或鎮或撫率隆其任與巡按御史相錯制世宗六年始定設又四十年而始兼軍務一切錢穀兵甲訟獄舉刺興除聽便宜具文而權益重今上御世三十年而人遊成宣歷二百餘載其以御史中丞及部臣鎮守者若而人以部臣卿寺巡視者若而人以都御史大夫及御史中丞兼理軍務者若而人其邑里仕宦久近官爵贈諡所至詳莆田林公碑及姑熟徐公鐫記中凡六十六人稱重臣等也夫魯道齊法蕭規曹隨余濫為之後能不畫一奉之竊謂在昔功忠彪炳寓內者無如文成王公忠烈孫

公夫以死勤事以勞定國人臣事君之上物也然豈兩公所欲哉功以迫而後起名以相持而後成周公破斧東征豈其得已彼牖戶綱繆固公所為周室莫八百年基業免國家於予侮者也自兩公外余不能悉舉舉所覩記者若韓襄毅以奏奪護衛稱林司寇以議減廩祿稱韓莊億以止遣中官罷徵陶器稱張襄惠胡莊肅陳恭介以殲緝萑蒲救災蠲賑稱雖人人殊均無失其所為牖戶綱繆計兩公先後相輝映寧少遜哉何也撫之為言拊也時平政理海內無事為之昭德畜威輯和鎮靜以消邪萌不幸有大危疑大患害衆人相顧雙雙無可柰何為之辛酸百慮呼吸萬變而平定其傾兩者並重要以因時附衆歸之拊循譬之撫摩羣兒痒痲疾痛總適於安故諸公文武剛柔不同用其先事而戒臨事而任惠養元元而固疆圉用圖治安所為國家重一也上上神聖坐理江右諸郡國吏奉職士奉訓庶民微輸轉餉惟恐後無悍宗強寇狡焉不逞之徒伏釁肩睫不可謂之有事然而中貴人礦金樵木開採權稅之使十道四出焚林竭澤而意不贍吏民歎息愁苦之氣所在而有詎得泄泄泚然謂天下無事余材能遜中庸竭區區血心拮据從事斤斤酌損之而無救於時事之一有如值逆藩羣盜之會為文成忠烈力當其衝轉橙杙

而盤石必退三十里避舍不然仰而視莊僖莊肅恭介諸公或不敢望項背而進則安所為重稱天子撫臣後六十八人起也語不云乎名者實之賓君子疾沒世而名不稱焉况為天子當一面其所措置前事之師覆車之戒不啻懸鑑而列眉可畏哉彼卑官小吏一方一職智効力殫猶足免於素餐汗顏之譏吾見重之難為而名下之未易副也余輒不自揆再為勒石以記而綴名其末以志慕也若夫名副其實紹諸公芳矩則俟後之君子

國朝

巡撫宋犖題名碑記曰司馬溫公作諫院題名記有曰某也忠某也佞某也直某也詳後之人將歷指其名而數之可不畏哉是知題名者所以誌景行垂鑒戒非徒侈名氏於豐碑也巡撫都御史於明宣德間始有專官江西行臺題名凡有二自賈公諫以下六十六人為一石則有見素林公為之記益以夏公良勝十七人為一石則夏公自為之記而

國朝

諸賢闕焉未備余稽之誌載詳其爵里自李公翔鳳至不佞犖止凡十五人勒之貞珉列於廳事之左歷觀前載自建官之始終明之世合八十餘人其間如韓襄毅林貞肅孫忠烈王文成諸公或臨難不苟或戡平大亂皆忠貞果毅事業彪炳至今猶在人耳目餘則或存或亡有知有不

南昌府志

卷四 建置

六

知者矣我國家應運興隆

今天子

繼體立極凡大臣秉鉞而來者靡不推誠置腹假以便宜其一時治狀父老類能道之茲可無述余之前即今大司農福山王公蒞事甫旬有四日隨遷閩總制而去然其風裁峻整宏綱畢舉余一循其成法而酌以時宜略加損益夙夜兢兢三載於茲矣夫觀在事之歲時考政事之得失則其人之賢不肖可坐而得矣且三復司馬公之言尤畏夫後人指名而數之也敢不勉哉

撫標中軍署在南昌縣地方按察司署後大街縣志

提督學政署在南昌縣地方按察司署東即舊副使道署

康熙四十六年特差四川道監察御史楊顥提督江西學

政因改建為院署乾隆二十二年督學張映辰重修二十

八年督學周煌修理考棚及大堂東西書房三十六年督

學汪廷璵修理辦公書房及書廂房庫房科房稿房三十八年督學曹文植倡建考棚十四重自有記彭元瑞趙開

元張華甫皆有記 四十一年督學蔣元益修理大堂川堂

宅門花廳四十四年督學汪永錫修理內署三堂宅門花

廳廚房捲篷四十八年督學胡高望書福建學政汪薇聯

句爾無文字休言命我有兒孫要讀書於大堂省志新增

學政曹文植記曰

國家賓興之典以三載為期而三載之中則各有學使者先為之造就而甄拔之故學使者之習於諸生也最久而其為任亦最專且重膺斯任者豈可以一事或苟乎哉顧有力所能為者有力所不能為者端士習整文風俾人吾庠序者悉通經學古之彥而不許虛浮佻巧得以溷於其中此則力所能為也若夫欲為其地興利除弊而必出於建造之勞且其建造也可以使之不費官帑不延歲月竝不

南昌府志

卷四 建置

致有勞夫上之人而羣自忻忻然而赴公家之義此即事果益於學政亦必出於吾庠序士樂善之誠倡以諸大吏鼓舞作興之治化而學使者亦何力之有雖然前此既有志未逮矣而今學使者適會其成功焉則目覩而樂之亦固其所乾隆三十有六年辛卯九月予自粵東主試還即奉

命視學

江西江西固人文淵藪而南昌為江西省會地宜人才視他郡較夥校士之院宇亦宜視他郡較寬比行歲試事則南昌新建兩邑之與試者合而肩之號舍不能容往往學使者皆移試貢院中子性苦迂謹以舊例不得不然而屆期於書隸之防閑伺察之周密則亦視他郡勞瘁倍之矣先是試院東南隅有文昌閣閣後觀音堂偏處號舍外餘悉民地後又臬司署射圃事有苦於無可基而遂無可為力者非此之謂乎而臬使歐陽公則已慨然欲以射圃之餘地為茲事倡而中丞海公及方伯李公因慫恿而玉成之為南昌紳士鼓於是諸生踴躍喜其基之漸可拓也遂上請於各大憲及予以始事告而各邑以數百金輸者踵相接矣射圃前為民地之有主者皆受價值而讓諸公矣即福廟之偏而處者已撤而徙之前矣時予正按試贛州南安各郡而諸生始事之人不遠千里而起工之日

時木石之多少以至間架門徑之尺寸向背無不一欲使予知且欲予指示方略必斟酌盡善而後已予故不敢以遙揣臆度者為越俎之謀而諸生既能善承各上憲之意而勇於趨公如此則豈尚有苟且以從事者乎予惟拱手以俟其落成而紀之以文為諸生誦美於勿諉是又予力之所能為者耳未幾諸生構佳石以請予記事之言予乃進諸生而勉之曰夫事不患乎不成患志之不立力不患乎不足患心之不專志果立心果專即聖賢不難以馴至而况區區土木之功乎哉以百餘年無所憑藉之事而一旦忽有其幾遂可不半載而底於成又况諸生事業文章有鄉先輩以為憑藉而專心致志其成也益易為功矣諸生勉乎哉繼今以後諸主果能充其所學而更擴而新之以上副

國家求賢之典則豈徒試院之煥然一新已哉學使者亦與有光榮也已是為記

彭元瑞增建南昌試院碑記曰江西十三郡南昌為治所提督學院駐焉八邑之士試於茲闔省諸生錄遺於茲自予試童子以來三十餘年未聞修治而新定令甲倚郭之二縣同日試以杜兩籍於是南昌新建之士四千餘人試院不能容則引而之貢院地大稽察難周未竣事而出署

南昌府志

卷四 建置

八

官與士兩以為非宜學士新安曹公持節是邦慨然謀所以擴之八邑之人仰承德意庀工飭材踴躍爭赴廉使歐陽公割射圃以益其基復購民居之隣院者得地廣十八丈袤十七丈有奇革舊益新四千餘席高明爽塏堅密靜深橐筆人士咸忭以奮走書相告徵文紀德憶乾隆三十有三年秋九月

大駕秋彌回予與公同直

中禁聯鑣逐

蹕於南石槽適副相汪公初奉江西督學之命於班列中俯詢利弊敬以是告時公端坐重默不置一言越

三年而膺茲任遂有是役夫集思廣益宰相之事也不動聲色舉而措之社稷之臣也方公聞言時旁之人未嘗知公受之於耳而公未必自以為識之於心乃一當其職而道路之間參坐之頃一席之談三年之久立能見諸行事公開濟內朗神明外恬夙以學行受

特達

之知它日必且為相以此用天下之人才聽納天下之言

豈徒一學使之任一試院之建其為事業可推暨而前券也予與公共事久厚一人之交三年中不遣子弟歸試而以予言之足備公采擇而不以人廢為可幸既須公德且諭鄉人士曰道若大路學在多聞必下帷執卷而後讀書

非善學也賈山曰學問至於蕪蕘求善無厭也諸君能體公之為政者以為學則進德修業之塗行止坐臥隨處皆

趙開元

奉新縣中書蔡元度獨捐增建南昌試院碑記曰

國家化理隆洽文教覃敷百數十年海內士庶自其先世鼓篋遜業沐浴詠歌蒸蒸向風蓋善氣之積而慕義之誠其所漸摩濡染非一時之效所能為矣南昌府屬試院號舍舊隘不宏時當陰雨上漏下濕暑月則炎氣逼蒸竟日不能舒肱余在諸生中應試時其苦况已備嘗之矣歲辛卯右庶子新安曹公奉

簡命

視學江右歲試校士時思有以擴大而新之先是撫軍海

公方伯李公觀察歐陽公詢謀僉同以故歐陽公慨然撥署內射圃餘地成其美於是鳩工庀材固基址高垣墉勤樸竄施丹雘自壬辰冬迄癸巳夏工力之費各視所隸弟子員之數哀金公舉分貲獨任刻期而集以蕙事蓋諸君子沐

聖化

久其切觀光樂為赴義其哀金者可與其獨任者則尤可

尚也夫即一事以驗士氣之盛即一郡一邑以徵風被之遠其所由來豈一時一人之故哉余邑蔡中翰元度不吝千金獨捐一邑之費規畫詳備始終不懈厥功偉矣事既

南昌府志

卷四

建置

九

竣邑人多其義寓書於京屬予記其事於所分修之壁余不得而辭也余憶幼時見其封翁損齋公遠於經術能詩多善行造命歲修葺邑中文廟數十年丹雘如新載諸邑乘而中翰復能繼其志樹德於文教之地是可嘉也余向所謂善氣之積慕義之誠漸摩濡染之已久者其在斯歟抑是舉也非曹公念多士之苦孰倡其事於前非歐陽公成曹公之志孰董其事於後余固嘉蔡君能盡吾邑之美而益敬諸上憲能倡闡郡之美是為記

張華甫武寧縣與修南昌試院記曰事之出大人先生力者士趨之民緩之其力不至士趨之民趨之近者趨之遠者玩焉其力亦不至士趨之民趨之遠近應之邑大者易之小者難焉其力有至有不至然則大人先生之力出而與邑之大小遠近士民無不至焉蓋亦非易也武寧距南昌二百里許邑遠而小應童子試者不下千人恭遇文宗新安曹公視學南昌覽東西廡耳舍慨然曰隘矣爾多士將焉處此於是諸生以增修之議上書閣下公口指手畫定為楷模觀察歐陽公拓以地方伯李公中丞海公總以成我文宗曹公寵以記區區武邑又何言焉然武屬古艾城修水上下縈紆數百里唐宋以來鄭堂柳舍山水文章之盛不以地僻而遠邑小而巖為同郡諸君子所不齒而

甫濫邀

聖天子眷顧備職司刑適丁外艱竊聞南郡士舍既成且速多士權祈鼓舞角力文壘以仰答諸大人儲才之意甫獨不能一詣洪州為吾武謝為諸大人賀為可愧也顧猶幸武邑遠且小為士民者霍然起而應之輸四百緡鄉城無難色趨事者又復勤勤懇懇不負大人先生之力為郡縣出而各出其力相與有成如此也故記

布政使司署在新建縣地方章江門內即明初南昌府署也司治舊在子城內宋隆興府元行中書省故址永樂元年以其地劄寧府遷司治於今處宣德四年布政使孟桓重修正統九年布政使吳潤充拓甬道護以石欄樹承流宣化二坊於門外左右成化十二年布政使王克復勅築東樓以配章江門城樓東南街口匾曰藩鎮坊正德八年

南昌府志

卷四 建置

十

十二月火左布政張嶺通志作頂重修十年右叅政陳洪謨署

印乃畢工正堂五間後堂七間名後樂堂堂前為川堂名

紫薇樓左右為翼室十五年左布政陳策重建譙樓嘉靖

三年陳洪謨為布政重建薇垣牌坊三十三年右布政潘

恩顏其東樓曰攬秀樓萬厯間布政使陳文燭重修紫薇

樓自有記後攬秀樓圯布政使陸長庚重建明末燬

國朝順治六年布政使盧震陽建葺康熙初布政使余應魁重

建大堂旁為經歷司照磨所理問所及司獄所都事檢校

廨後司獄照磨都事檢校并裁廣濟庫在紫薇樓右時憲

書庫在後樂堂右乾隆八年六月東樓燬布政使彭家屏

復建顏曰高觀樓并復藩鎮坊顏曰西江保障三十三年
高觀樓燬布政使揆義重建顏曰江天樓四十二年署布
政使周克開重修頭門省志 據冊新增

按舊志黃冊庫在永和門內花街巷前明舊庫天順八
年因城東故錢局地創立至宏治六年重修織染局在
府學東鑄錢局在東湖南二局久廢新錢局在司署後

僕家塘

明陳文燭修紫薇樓記曰紫薇省即古中書省也改自唐
開元而武德間置行臺尚書省於諸道馬端臨以為虞廷
出入帝命周官掌王八柄內外之職同也明興始因元制
置江西行中書省設左右丞尋改為布政使司國初建樓
紫薇蓋取中書省之意也嘉靖閒吾鄉大司空傅公頤為
左使修之萬歷以來傾圮日甚左使仁和宋公議修而不

南昌府志

卷四 建置

十一

佞至少參義烏龔公力贊焉兩臺允帑金百餘閱月而工
成美輪美奐督之者理問殷哲也南昌名都其勝在西山
長江而樓倚西郭銜山吞江浩蕩無際東如文筆塔北如
彭貞觀一瞬目而盡南有攬秀辨章二樓若左右翼晴登
之則朱光靈景在樓矣雨登之則風帆烟艇在樓矣月登
之則金波玉鈎在樓矣雪登之則瓊樹瑤階在樓矣大都
景以西勝云夫王者承天而布之民故曰王省惟歲卿士
惟月師尹惟日主上端居九五登樓北望邈若萬里歲屢
大禋詔下賑貸其仁如天卿士師尹無能宣布萬一登斯
樓也可以觀省矣遂書而鑱於石

按察使司署在南昌縣地方撫院東即宋漕臺院元廉訪
使故址也宋轉運使治所舊在城東北紹興四年張澄改
建於子城東為漕臺即今處元至元十五年改為肅政廉
訪使署至順二年廉訪使高納麟重修至正四年副憲脫
脫作新門虞集有記 明洪武乙巳始改為江西等處提刑

按察使司按察使傅獻創建宣德二年按察使童寅重修儀門三間左右門房各五間前屏門墻左闢行道面南爲正門門內左爲海棠祠堂後爲川堂川堂後爲堂五間曰百鑑堂東西夾室二閒堂之東西皆有齋戒堂正德十四年宸濠平按察使伍文定復拓而新之

國朝順治五年毀於兵按察使李長春重建有題名碑記康熙

初按察使婁布吳重建大堂九年按察使蘇銑重建寅賓館旁爲經歷司照磨所知事司獄司解雍正二年照磨裁乾隆初按察司凌疇增署後遮風樓爲五閒改建三堂左偏節樓爲爽樓樓東涵月亭并重葺之又建東軒連楹爲

慕朱齋軒後藝竹樹旁濬池通以略約皆退食之所也乾隆三十三年按察使佛德重修大堂三十五年署按察使歐陽永琦重修二堂川堂省志 據册新增

元虞集作新門記略曰昔世祖皇帝置御史臺領邦憲分道寘使其在江西湖東者總治於豫章於政事無所不得殆非分土列職效一官領一事者之比也至元二十八年以肅政廉訪易提刑按察之名然其聽政之堂府史之舍文書圖籍之儲門垣之設悉因其舊以時完葺而無改焉元統元年癸酉普顏公監憲也以爲外門前臨行道與儀門相值而不相遠無以致嚴密尊重之體度其東若干步更置門焉以舊門之地爲庫所部有簋簋不飾之懲者則度焉以示戒其爲門也樹兩楹設兩扉限以中闌而已無風雨之蔽居十三年而木多朽至正四年中順大夫寧夏脫脫自行中書省郎中來副憲事觀於門而歎曰是可以一日不葺乎行道懂懂幾與齊民爲比屋何可無所表異規作新門如儀門之制命有司度材擇工而從事焉乃於八月二十有一日工役就序次年二月大中大夫張掖劉

公沙刺班以監憲乃梓人告具明年正月九日甲午定柱石越十有四日丁未升梁棟而作焉公親率僚佐蒞之自行省以下郡縣百司咸集祝史陳辭神人胥洽工不待勸翕然奉能又七日癸丑中順大夫河內李公守仁以憲使至與二公志同道合無閒然幕府贊之者則經歷司君允德知事張君汝遴照磨高君克明也五月六日丁巳門成既而中順大夫張公珪來僉憲事門之爲屋基崇於地三尺五寸極崇於基三十又三尺南北之深四十尺東西之廣如其深而贏二尺鑄石木瓦丹護工徒之用出郡之經費中統鈔一百三十有五錠門左右爲崇墉高十有六尺八寸長十有六丈厚稱之其費中統鈔八十有五錠則憲司工膳之所節也董其役者憲使元翁阿里沙以有司治役者南昌簿陸某也憲府以集昔嘗待罪國史僑其部內之野而老焉惟有文學之好乃命佐書黃鐘持書幣來請記其事如此云

南昌府志

卷四 建置

三

南重鎮夙號易治自戊子己丑之變城郭榛莽廬井邱墟余頃奉命陳臬觀其化儻辛苦惕然憂之念新國用輕典古有明訓每遇金木之訊祇凜無敢縱濫而智識黥淺恒抱綆短汲深之懼寅恭啓廸惟二三僚案是賴甲午余叨量移值重修臬署告竣而題名久缺未備諸僚案咸以爲言竊意兵燹之餘文獻無徵前此姓氏既若存若亡乃開國十載以來創始諸人亦僅沒而不傳非所以崇昭代示維新也因磨礱片石而次第記之至於刑措教敷俟後之膺是任者

督糧道署舊在德勝門集仙坊明正德中參議陸溥建嘉

靖二十年象山王挺蒞任另建於九江道之東 羅洪先有

糧儲道分司記

後廢今移栽缺右布政使舊署雍正二年

添設庫大使七年督糧道高銳改門 自有記 乾隆八年副

使周人龍以所居偏仄非制就署西偏添建大堂二堂頭

門儀門并庫大使廨亦添建焉規模乃備省志 據册新

羅洪先糧儲道分司記曰國家賦仰給東南計天下所入江以南得什之六而江西視天下居什一焉其土地狹而薄東西南距嶺川洩其北無平原瀦蓄高田仰澤於雨而久川輒泛溢故水旱之報無虛歲農民四時勤苦僅足食而不能滿一歲而賦入去其強半故富家思厚藏必詭法自便而老胥則亂版籍得出入丁稅以罔機利或阡陌連數里其稅不踰於畸人貧而愚者既無以自食又多陰代富家逋稅官司莫能原其來由祇據籍征斂惟後時之誅每下令又為猾僧取持廣其羨目長其時直逞不肖之心而以賂相逐蓋十三府一州七十三縣皆然也而自府以下又各有分部常不下百十人省以一人督率之其耳目必有所不逮故民不困於賦者蓋亦什一而省中督率之勞視他司訟獄亦當十之六焉非有惻怛子諒之心剛果明敏之材變通輕重之術然且早作而夜思人謀而利制固未可辦此使復為出入之防關上下之情則督率雖宜未足以為惠也正德閒叅議陸君原博始建糧儲分司於

南昌府志

卷四 建置

古

集仙坊蓋因沒產為之其地湫溢無以容眾其制寢陋不能嚴出入其道路紆僻吏民之奔命赴訴者不便嘉靖庚子冬象山王君子長自工部擢是職明年秋至官既數月則建稅役儲蓄二議以布已意又數月因吏民之情以分司署請於臺使盡質其故業益以贖金擇九江道之東公地之隙為屋凡若干楹而廳事燕休庖寢憩藏之所靡有不備前為重門四周為崇墉視他署之崇嚴相等而又相連比吏之抱牘以進者堂序有嚴民之環屏而候命令者日以不廢經始於壬寅二月而告成蓋將於是既其心盡其才然其變通以宜民者亦可槩見其什一矣夫民忍飢渴奔走以受聽斷一日之淹猶為念也而况偏抑以陷窳慘毒於腴削者不尤足悲矣乎吏之竊符偽章目逆而頤指猶足為禍福也而况習故以舞文懷墨以攘奪者不尤當察矣乎數月之間耳目所逮有不利者雖舉羸役眾猶若不容緩也又况加以歲年凡耳目所未及其關係尤重且大者將不次第備舉矣乎王君為工部與聞朝廷財賦之議常憂以天下固不獨江西之民然甦東南之困以培國家之命宜自江西始故因記是役也附以見聞而必有望焉

高銳記曰國計莫切於糧務官箴甚重於關防我

皇上澄清吏治薄海內外視同几席固已大臣法小臣廉百官得其宜萬事得其序矣雍正七年七月吏部行文以藩司為一省承流宣化之大員出納錢糧甄別賢否責任尤重宜照臬司衙門例一體封鎖關防江西即日奉行而督糧道署舊在布政司儀門之內本右布政使奉裁移駐其署歷有年所矣今布政使奉文關防而糧道有督運徵漕之責江西禾稼登場早晚不同十三府七十八州縣輸將遲速不一飛書徵召持籌按驗晨夕不遑若仍前與布政司同門出入是封鎖關防之義不符而漕務或有誤也銳以六年之秋由廣信知府奉

特簡陞任督糧道遂度儀門之外大門之內循右而行設以柵欄隔以周垣甃石為路重門深進工匠之役木植磚石丹堊之費皆自捐養廉凡二百四十餘金興工於七年十月初七日至二十六日告竣伏念銳世受國恩先大夫督學江西教澤在人心近五十年學士縉紳猶能服習傳誦思慕無已銳前之任廣信恭請

聖訓蒙 皇上召見 天語諄諄勅以潔身奉職銳敢不夙夜勤慎矢忠矢孝以仰承 皇上教育之恩無致隕越以遺先大夫餘憾受任以來恪遵上憲

南昌府志

卷四 建置

明飭督率州縣一切漕務陋規浮收耗羨諸弊禁革靡遺每歲二月送漕過淮幸無缺兌祇供厥職不敢言勞屢蒙

恩議敘九年五月又蒙 允題兼巡南昌撫州建昌三府從此督糧道署兼有地方之責矣

皇上不次隆恩上憲鼓勵作養至意謹附識於此夫衙署關防謹飭官方之要道也小心殫力臣子奉職之常也宜識年月用垂永久以示勿忘是為記

鹽法道署在按察司大門內西偏建置年分無可稽考乾隆三十二年鹽法道塘琦請支鹽庫匣費修造大門三間大堂五間堂東一間為銀庫西一間為外銀庫又增建東西廂三間三十六年鹽法道劉墉重修署前東西坊三十七年又修住房養和堂及署外承差房三十八年鹽法道

李源重修西南兩書房并增建住房箭亭四十年又修署後正樓配樓又修署南關帝殿觀音堂四十一年鹽法道吳山鳳重修署外官廳四十五年鹽法道杜憲增置署西民人屋以拓署基又署前舊有知事署一區自二十二年裁南昌縣南浦驛歸併知事兼管南浦驛卽移駐城外南浦驛署鹽法道興德捐買知事署舊基歸併道署增建房屋據冊新增

南瑞總兵署在南昌縣地方廣潤門內萬壽宮西北本察院舊署明嘉靖中以巡撫衙門改爲察院正中太微堂後爲端本堂

南昌府志

卷四 建置

十六

國朝順治十八年察院奉裁後改爲南瑞總兵官署省志

鎮標中軍署在南昌縣地方惠民門倉巷口卽舊都指揮使司署雍正二年奉裁都指揮始改今署省志

按省志載有都指揮司舊署在省城中文錦局舊址明洪武初都指揮使宋晟等創造天順五年都指揮同知王貴重修旁有經歷司斷事司今俱廢

南昌府署在新建縣地方舊在司馬巷卽新建縣舊治漢晉豫章郡署在城南有子城東西雙闕門唐洪州爲都督觀察節度使治所宋仍州置鎮南軍後陞爲隆興府太平興國中郡守張繼則重修施元長書名揭於中門之楣楊

傑有記

元仍宋舊基改爲行中書省移隆興路署於章江

門內南昌縣在其左新建縣在其右又左爲錄事司明洪

武三年知府趙文奎併司府二縣地重建永樂元年改爲

布政司治遷府治於今處正統元年知府任肅復新之宏

治十二年知府祝瀚因卑隘鼎新之

張元禎有種德堂記

萬曆七年知府周良臣重修

自有記

十三年知府范涑建

公府齋居於署內

自有記

三十四年前後堂庫燬知府盧

廷選復建

劉一燦有記

國朝順治五年燬於寇知府羅長元及郡僚皆寓居民舍康熙

二年知府葉丹重建十六年知府甘國棟擴大之乾隆四

南昌府志

卷四

建置

七

年六科吏舍圯知府吳同仁重修十年知府李倓重修遮

風樓及廂房三十四年知府汪鍾修葺頭門儀門東西班

房兩廊科房大堂宅門二堂三十八年知府錢策重修三

堂東西廂房遮風樓東書房未葺事改官知府許蔭楷續

修增建西書房三間四十八年知府黃良棟借廉修葺

舊志 據冊新增

宋楊傑記曰今天子即位元年春三月己巳洪州初以州名表於門何以書重正名也豫章之水原於虔化會貢水而爲贛東北至於洪崖之陽漢置郡曰豫章因少名也易郡曰洪州因山名也唐治軍建節曰鎮南制遠俗也僞唐僭稱南都避中原而北遷也宋削平僭僞聲教被於四海州名從隋仍舊貫也鎮名從唐存武略也鎮名則有節度使以領之州名則觀察團練刺史以鎮之是二者之名不可闕其一也而鎮南之名固已表於府門矣惟州名則闕

然未之表也兵部施公出守是邦以德義鎮俗事為有本
乃命以州名表於中門表之所以正名也正名不可不書
故書之

明張元禎種德堂記曰南昌舊有獄在郡治左園牆僅一
畝積繫至千餘人校者繯者羣者桎者跂惟容趾蚋
嚼膚蟻噬血恣其腹滿而去牛之桔者饑食其角疾之危
者豎入其育刑未至極年已盡算民罹此酷數十年於今
矣山陰祝侯以宏治丁巳來守於茲慨念而深矜之訟牒
之所訴者斷訖遣去不合入狴扉獄吏囹圄常為一空然
廷臣之鎮巡總治於茲株連根引實繁有徒南昌之獄難乎
有訟事者俱集於茲株連根引實繁有徒南昌之獄難乎
其畫地矣侯相府治南有舊老子宮買地買之遂因其地
作屋以楹計者如干築牆以雉者如干前創大門中起巨
堂顏曰種德取臯陶邁種乃降之義審出不服者來宅焉
時巡按御史王聞之曰弭災致和莫甚於此夫於災能弭
而後和可致警種田然稂莠既芟嘉禾自植德之種也何
莫不然獄成於今年冬半不閱月大雪民占有年侯曰雪
則瑞矣其如獄民之寒瘦何躬詣舊獄新獄計口給薪米
解縱青災至二百餘人得釋者如脫焚出溺熙熙然父子
兄弟相慶於道侯真所謂種德者哉後之居是堂者尚體

南昌府志

卷四 建置

六

侯心以種德為事若馬其口孔其項以是而求臯陶謂之
種德則末矣必教於是弼中於是協執頑叟服頑苗俾一
人有慶四方風動然後於德為能種焉甫刑曰監於茲祥
刑謹以是為種德堂告

知府周良臣記曰南昌故漢豫章郡也國初稱洪都尋倣
唐制建會省稱南昌府云所統為州縣者八儒學倉庫驛
遞巡泊者五十有八編戶三十萬科糧五十萬山川文獻
名物之盛甲天下蓋宇內雄郡也獨府治卑庠不稱往制
攷自洪武三年郡守趙公文即唐觀察使治所益以州邑
故址構章江之東永樂改元寧藩南遷乞封時不假圖遂
移布政司於府治府則就新建治所為之宏治閒郡守任
公肅治葺率務省便莫軌於度迄今越七十禩欹朽日益
滋每視事輒聞蠹蝕聲潰蜚蜚若也咸謂不葺且大頽余
亦時時語僚佐謀新之顧深計而中輟迺萬歷乙亥歲夏
四月十有四日俄聞西北兩楹傾聲甚迅人馬辟易會余
方理牘燕厦胥徒各就廨莫有罹者然三楹亦撓榱折岌
岌且盡棟頽矣不獲已爰白諸司報曰可翼日余率僚佐
達觀故宇程物宜覈因革檄南新二縣合林應訓詹沂校
經費書餼糧鳩徒庸越七日庚寅用牲於司空昭升經營
乃屬知事李綸照磨周書督津吏輸材木屬經歷童養浩

檢校李如桃具畚揭紀功實屬縣丞胡慶錫史守中庀器
具佐將作委輸責之縣正汰浮淫也稽閱總之在已虞媮
妖也卷石塊礫寸薪尺朽咸有主者防漁蠹也材礪鍛磚
聖斃膠采公市平估懸格臚列慮侵擾也縮溢伸乏辨材
程能樽勞節力獎勤振惰百司執事各辨其物經始於四
月二十有二日越九月十有一日告成堂五楹高三丈一
尺有奇廣倍之軒楹稱是費凡五百三十三緡有奇取諸
公帑之贏者取諸贖金之哀積者取諸舊料之旋售者不
以征於民民方病早艱食藉是得食力於公役既竣上下
宜之余追念慮始之艱有遠嫌慕潔莫適任其責者有視
為蘧盧汲汲若不朝夕者余嬰其微不憚囂譁以從大役
經紀五閱月而不聞澤門興役之謠時詘舉羸而卒免於
咎實賴士民和會暨僚屬協衷祇事以能有成迺敢記其
始末以勞其事且以詔來世云

知府范涑記曰公府齋居者何府治為別居以視公事者
也公事自府治出矣別為居者何簿書期會有恒經亦有
大典傳所謂戎祀及選士考績如功令則較藝程書鍵署
居業重其事也居而齋者何先儒謂齋為齊齊其思慮之
不齊者然與否與子思子稱慎思魯論稱遠慮而十翼乃
以天下何思何慮繹咸之繇惡在其慎與遠也咸其無心

南昌府志

卷四 建置

九

乎思慮其有心乎有則憧憧不齊孰甚焉惟慎與遠始能
祛其有以歸於無無者純乎一理妄念屏絕乎上下格幽
明皆是物也無而未始無也所謂何思何慮然與否與故
上聖齋神其次齋心其次齋事神無在無不在世觀其妙
罔覩其功大傳言齋戒神明子輿氏言聖不可知其謂是
歟夫心神明之宰變動不居思慮出入豈皆如聖人則戒
慎恐懼加於無所觀聞不以有事防無事懈動靜合一乃
稱齊心顏氏庶幾亦不得而見之矣得見齋事者可矣考
魯論亦以執事敬言仁敬則萬慮澄空總歸一理凡毀譽
得失利害順逆一切機智皆忘之所謂何思何慮者也制
事制心原非二致於齋事乃見齋心抑入道之教歟居有
堂名抱陽者何堂於府治為北史言負陰抱陽人之生然
也陽於色為赤於人為心報主庇民義本天植彼憧憧者
反失之縱欲滅理又其甚者堂之地即嚴相黨與所籍產
顧名思義或雙然有所惕歟堂前為大門門之楹三左右
內外楹各有差堂後為楹倍於前東以北為庖漏蔬園西
透迤而南翬然離向者為主靜軒慎動實也主靜要也亦
合一者也齋居之義也居前廣九丈三丈之一中廣視
前縮二丈二尺後廣視中縮一丈一尺袤十有四丈東西
同鼎新於萬歷丁亥夏五月竣於六月程材鳩工一取於

羨地之值不踰時不費民南昌令何子選同新建令余子
夢鯉營之南昌典史楊汝德督之而余檄之又為記之
劉一燦記曰蒲陽盧公來守豫章朞月而政通民和廼始
飭墜緒畫永圖川澤波池坊庸道路之閒井井如也亡何
而郡治之堂燬或者曰大夫孳孳勤恤德與吉會法不宜
災嗟乎是未測天人之故者也夫天之於人或罰之或震
之或開之譽宿則用罰過新則用震其或沴將乘備未起
則寐而覺之令消彌被濯如商羊之兆於齊樂喜之備於
宋是也豫章故多火漢太守張公躬瀦湖受水火始殺近
且為沮洳已大夫怵然如潛凡水泉疏濬無不早慮是年
又曠而祝融不為厲斯非天所贊耶宋景熒惑守心古者
欲移之民移之歲移之卿大夫皆不可幸以身任之大夫
意豈異於是以前境寧宇而令一人之居受其燼以一人
塗墍築鋪之勤而易萬室之蓋藏大夫懽然當之矣時大
夫朝車已戒廼庀材絜工屬倅吳公為榘而後行上計還
則歸然雲構矣是役也經始丙午之冬六越月告成事賦
不病民力不刑衆弗溢弗多頓還舊觀既落成而大夫肅
衣冠造余曰不穀奉命茲土廩廩務拊循不獲已與繕為
諸父老子弟憂心寤寐焉子為我記之余曰唯唯夫為上
者未有不勤於民者也大夫之堂考政序事糾刑位宁之

南昌府志

卷四 建置

建象魏之布胡可緩諸善為政者為之於堂上堂之不存
政於何有考與革蓋締造三十七年遂已風雨剝蝕後
空兩宮之役身處畚鍤閒工必中程材必中度贏縮損益
之故熟於目而慮於心辦此何難焉語有之能者有餘拙
者不足部署不失費省而業鉅用力少而課功多此非天
之所以開大夫哉豫章土地赤窶顧盡節公上自其性然
矧大夫下車而省供需輕論贖服妖有禁酺飲有禁傳塞
有禁民安環堵而忘大夫之露處馨鼓之聲庸可既乎斯
以徵子來之効已余聞之吏道不貴擾擾則無民不貴偷
偷則無政夫供公家之役而建百姓久遠之利擾耶非耶
溫太真韋武陽竝以惠政顯名豫章今按其故蹟在郡內
居多此寧無事事而傳舍守一官者千百載而下大夫相
照映矣大夫政先興除而要之愛利民為本余適家居習
大夫然未敢更僕為諛畏壘尸祝需之乎大夫入為六卿
三事而余從黃髮耆者扶杖伸其說末云晚也大夫名廷
選壬辰進士繇繕部尚書郎推擇今官倅吳公時憲別駕
袁公守訓徐公一經司理
高公繼元咸在事得竝書

同知署在府治右本理刑廳署康熙六年理刑缺裁因移

駐其署乾隆十四年署同知王時煦三十五年同知久常
先後修葺四十二年同知杜一鴻重修舊志 據冊新增

吳城同知署在新建縣吳城鎮其官舊屬南康府雍正八
年移駐吳城九年同知胡式瑗建署乾隆三十一年改屬

南昌府是年同知鍾光豫借廉修葺據冊新增

通判署在府署左豫章樓右康熙五十六年通判夏景棠

修乾隆三十四年通判王燾復修四十二年通判李振祖

復修舊志 據冊新增

府儒學署詳學校

經歷司署舊在府正堂東年久傾圮雍正年間移駐楊公

講堂在中大街佳山廟旁舊志 乾隆五十一年府照磨移

駐新署而經歷署距府遠因令移駐府堂西照磨舊署以

經歷署爲公所據冊新增

照磨所舊在府堂西無署官賃民居康熙四十七年建署

乾隆三十四年及四十三年借廉重修四十九年巡撫郝

碩奏請添設府監移照磨管監并爲建署於豫章樓之南

路東首五十一年部頒照磨兼管監獄印照磨周泰階始

移入新署據冊新增

按舊志載理刑廳署在府治右知事署在堂東檢校署

在堂西司獄司在府治西大街稅課司署在南浦遞運

所右卽舊茶引所昌邑河泊所在新建縣昌邑鄉港口
河泊所在南昌南鄉渡以上各缺俱裁署久廢

陰陽學在南昌縣地方鐘鼓樓後

縣志

醫學在善政坊火神廟左康熙三十八年重修乾隆十二

年爲藥王廟僧私據醫官訟於官立禁碑復舊

縣志

僧綱司道紀司及各州縣四合衙俱無定所

舊志

南昌城守營署在南昌縣地方棉花市澹臺祠右卽會府

舊基

縣志

南昌縣署在西大街之右上藍寺故址宋故縣治在郡城

東北隅元遷於章江門內隆興路治之左明洪武初遷今

南昌府志

卷四 建置

三

處知縣黃德銘建嘉靖六年燬知縣陳世輔重建萬曆十

五年知縣何選修葺

萬恭有記

三十三年六房儀門大門

燬知縣黃一騰復建正中懷保堂東西二庫

國朝順治五年以後屢修康熙四十二年知縣王廷對重修大

堂

齊之千有記

乾隆三十三年知縣徐聯奎增建

縣志

明萬恭記曰南昌古豫章輔邑也漢治東廓一舍故爽塏
利居室韋武陽徙治今章江之湄地故卑濕永樂初分封
寧獻王居藩司署乃居藩司於府基而居府於南邑之故
基又居南昌治稅課司之基與新建南北畫土而分隸焉
然衙宇西濱章江巨浸湯湯東壓寧藩崇岡言言旣又爲
藩所蝕居其私人危垣重閣迄於今猶未恢復也以其故
地極汗下二百年來懸綬者鄙僅構容膝圖旦夕安豈復
有攸躋攸寧之度哉吏故傳舍衙宇衙宇亦復傳舍吏故
室極湫隘居者數不利萬曆丙戌姑蘇何侯以循良異等
調而至於時天久陰雨江漲暴齧而汗下湫隘者曾不可

蓬累而托膝焉乃白太府范公中丞陳公直指孫公獲百金不足乃市公府間居以益之又不足乃捐捧四十金并益之不一三月成之矣正堂五楹崇視公堂博稱之東為思過軒三楹西為報本軒一楹川堂三架外建禮賢館三楹景哲堂三楹以祀漢以來賢令者雖新舊雜治之其實皆新創也始事於丙戌十二月落成於丁亥二月而規模宏遠矣明年水明年戊子又大水侯陸行乘舟濤浪澎湃療疾賑飢載粟里圩與我父老甦旦夕之命者踰三載什九在外十一在內而高明爽塏者又不得久藉而托處焉頃之高畝乃登於是陸之民號侯曰我陸人樂也許許而父母何苦水之民號侯曰我水人生也競競而父母何疾蓋至是侯有寧宇矣乃求余文而紀其事余嘗讀書至治蒲者入其境田野闢入其邑道路平入其郭公字分明觀政猶以為有三善焉而况仍之以巨浸連之以洊荒縣官所為重足而傍徨室家所為反袂而徜徉者也侯固上之將天子休命次之興舉大吏意指下之彌縫百姓之大難而匡救其災而又令退食委蛇婦子寧止蓋其氣浩故能先民而後身其才裕故能時紉而舉羸其神定故能形勞而心逸異日者持其中軸將外安有如此邑內寧有如此室矣今著之於珉後來者得覽鏡焉

南昌府志

卷四 建置

國朝齊之干記曰今之縣合猶古之列侯也周制公侯五等故縣有大小治縣有繁簡貴以才量乎地也我怡齋王公起瑯琊世家由太學合廣信之鉛山縣特移知南昌縣事蓋南昌之為縣大矣縣之事繁矣附會省而為七十八州邑之長古所謂莫大諸侯也重之以憲牒之叢委賓燕之雜擾朝呼夕馳有不暇哺與沐者故雖有才合達達文書治事無餘地而追恤乎他公始至坐廳事循覽周垣詫曰有是哉茲堂之不如逆旅傳舍也毋亦惟是為邑者之以逆旅傳舍視茲堂也雖然受代之未久而以興作役吾民不忍也既三年政務有經人吏浹和於是構材庀工擇日而始事焉未三月工訖公以書來請記子與公通門世講隸籍部內不能辭記曰南昌之人版圖六十餘年矣政事之堂因陋就簡未聞有更而新之者獨公奮然修舉廢墜豈徒以尊瞻視肅體統哉蓋公之所以樹斯堂我知之矣一日宣主德

聖

天子

方甚愛爾民江右地外且遠不得直致於爾民以寄之督撫又寄之監司又寄之郡大夫而後以致之合冀爾民飢寒疾苦之上聞而無不得其所則茲堂之所仰而曰曰曰明無敢戲豫者也一日導民情爾民有無可如何之故隱之於作息隱之於訟獄隱之於征斂匍匐輾轉之下雖義

不可緩法不能道賢父母痼瘵在身但悼慘戚之無已則
茲堂之所俯而民視民聽不敢怠遑者也若夫蒞茲堂而
有一善政焉積之有數善政焉又積之有數十善政焉風
聲所被七十八州邑相觀而益善然則當事稔公之才謂
可以剗煩理劇建爾元侯式是南邦者其在茲堂與其在
茲堂與經始於康熙癸未二月落成於四月通費木石工
銀皆出公俸以權宜足之乃知公才之有餘而及乎他者
此足以兆矣謹識其歲月如右俾後之居斯堂者有以自
省而不忘作者之所始云公諱廷對號怡齋山東新城人
王臣南昌縣令題名碑記略曰南昌為江西首邑號稱文
獻然內隸省會外當閩廣吳楚之交又土瘠賦重征科日
促十羊九牧民志靡定為之令者縱使才力過人幸智慮
竭於會期精力罷於奔走求其克盡親民之責非豪傑之
士其孰能之然則令吾邑而稱賢於後先者奚宜勿傳舊
無題名之碑誠缺典也和門吳侯自宜春調繁而來蓋有
志於親民者期月政孚民和修廢舉墜迺稽邑志得前令
宋公英迄葉公國華凡四十有四人第其履任之先後勒
名於石虛其左以俟來者以臣邑產也俾識其歲月義不
容辭侯名瓊字德輝乙未進士廉明剛斷剗繁治劇綽如
也茲維曠典之舉垂師戒於永永遺愛吾民其有涯哉其

南昌府志

卷四

建置

二

有涯哉

儒學署詳學校

縣丞署舊在縣堂左康熙四十八年知縣佟世俊購買民
地建於署西南鳳皇坡乾隆四十二年縣丞張昉借廉修
葺據冊新增

主簿署舊在縣堂右今移三江口巡檢署先是雍正七年
吳城移駐同知移吳城巡檢駐三江口動帑建署乾隆四
十年巡檢錢江借廉修葺四十四年巡撫郝碩題准改巡
檢為主簿署仍舊據冊新增

市汊巡檢署在市汊下街舊在市汊驛之東明末燬於火

國朝順治初乃遷今處乾隆十三年巡檢李漢增建縣志

典史署舊在縣署右康熙四十八年火知縣佟世俊將衙

前別公講堂改建乾隆四十二年典史楊瀚借廉修葺縣志

志

南浦驛署在南昌縣地方廣潤門外龍子巷東街今裁改

按察司知事署於此縣志

新建縣署在府治西稍南宋故縣治在縣城東隅即南唐

林仁肇宅址太平興國間主簿何慈創建黃公權有記元

遷於章江門內隆興路之右明洪武三年知縣李璫遷於

城北司馬巷永樂元年改爲府治徙於東湖之左即今貢

南昌府志

卷四 建置

三五

院十八年復遷今處宣德三年知縣茅自得重修

國朝順治五年燬於兵權移射圃亭都督舊署十七年知縣魏

雙鳳重建中爲親民堂後爲新新堂康熙十九年知縣楊

周憲增建縣志

黃公權記曰爲後世之吏得行其志者少矣此仕之所以
難也而縣爲最甚何哉凡縣之鎮無大小令主簿皆獨任
而民事委曲當有所操縱急不能一斷以法緩舉法而繩
之則其罪故易求也凡有所爲問不可於州執一而違
之則其勢固易撓也其罪易求其勢易撓故爲之者有以
得於州然後其濟可幾也不幸而一一錙銖與之弗則大
者求其罪小者撓其勢將不遺其力矣吏之不能自安豈
足道哉縣有不與其擾者乎方是時也天下能忘其勢而
好惡不妄者鮮矣能忘人之勢而強立不苟者亦鮮矣州
負其強以取威縣憂其弱以求免其習已久其俗已成之
後而守正循理以求其得於州其亦不可以必也則仕於
此者欲行其志豈非難也哉君子者雖無所處而不安然

其於自處也未嘗不擇仕而得擇其自處則縣之事有不
敢任者豈可謂過也哉洪州新建自太平興國六年分南
昌為縣至嘉祐三年凡若干年為令者凡三十有九人而
秘書省著作佐郎黃巽公權來為其令抑豪縱惠困窮守
正循理而得濟其志者也公權亦喜其職之行因考次凡
為令者名氏將伐石以書而列置於壁間故予為之載其
行治而因著其為縣
之難使來者得覽焉

儒學署詳學校

縣丞署舊在本縣治右今移射圃亭乾隆四十三年縣丞

張五緯捐廉修葺

縣志

吳城主簿署在吳城驛南卽吳城巡檢署乾隆四十四年
巡撫郝碩題改巡檢為主簿署仍之

縣志

生米巡檢署在生米鎮原為烏山巡檢後移駐生米鎮乾

南昌府志

卷四 建置

三六

隆二十九年奏請改給生米鎮巡檢印

縣志

趙家圍巡檢署在縣東鄉今裁

縣志

典史署在縣右稍南

縣志

按舊志載郡城內有總督部院署在城隍廟右本元平
章府

國初為提督軍門府康熙元年為總督府四年改為總鎮府

十三年總兵楊富叛署廢今名楊家廠又載清軍道分
守湖東道分守湖南道三署俱在布政司大門之內分
守南昌道在廣潤門內鐵柱宮前分守九江道在糧儲
道西清軍道在忠臣廟右南昌道在易俗坊湖東道在

明倫路湖西道在洪恩橋分巡九江道在蓮花池察院
二所一在按察司東舊城隍廟故址一在鐘鼓樓之右
卽菩提寺故址今俱廢 省志

豐城縣署在縣治正中唐永徽二年遷縣創建宋皇祐初
縣令郊脩輔建勅書樓 周鶚有記 元至元二十三年陞為

州至正壬辰燬於兵明洪武二年知州強立增修九年仍
復為縣知縣林弼重建二十九年縣丞何昭善充拓之正

德初知縣謝顯修隆慶二年知縣張正道重修 雷禮有記
明末燬於火

國朝順治八年知縣宗葵鼎建 自有記 康熙五十四年知縣盧

南昌府志 建置 卷四 七

佐斌重修乾隆三十六年知縣于崇勅借廉修葺四十二
年知縣鄭樞借廉復修 縣志

周鶚記曰上□□之明年冠元皇祐构建嘗陬之初豐城
勅書樓成長棘寺丞郊侯授筆於周子書草故也宮城通
制凡邑吾民宣教令必壯署以表其位位有表必轡門以
吭其署署有吭必威俗以制其觀乃旨門梁厦曰樓將以
嚴甲令而虔王命也完版圖而厚生齒也故額繇是舉惟
江西總治邑七十引上游者茲為望初冬十月侯甫蒞厥
事偃然殲弊病補廢弛彼稂且秕耘去略既翊載中商民
亡駭政乃曰位苟稱祿作弗圖欵陳焉足勤吏師若解舍
之右前治更葺僅備迄是樓會守將幾重斂而息今按所
委之材得請於府遂稽工程力勅朽撤敗隆其礎砌役弗
外撓督削須備則擇綠垣老樹之材者會數浹日考焉輪
焉制作度焉公庭斯焉觀者毅然所謂甲令版圖則僉焉
君子曰樓者曠曠然明也明於外景物形勝之謂歟中民
病苦也明於內除衛顯敞之謂歟馭吏之儉黠也若其內
外之政令行豈特樓之營而實治之經歟夫飭燕嬉豔賦
詠不其遠而嗟夫仁人之作也勿亟是宜民不復勞而君

子將其美故書樓成

雷禮記略曰豐地官署自唐以前不可考永徽二年建堂於中後羅兵燬元至正十六年重建入國朝洪武二年強侯立增修二十九何丞昭善復充拓之至正德初謝侯顯以廳圯草創構堂年久因循弗葺日就頽壞隆慶戊辰潼川蕭山張侯以進士來知縣事周覽咨歎曰噫哉土敝則草木不長澤淤則龍蛇不宅茲縣蒞政之地民所依也而若是陋乎具狀請院道咸報可責之成於是侯規度程督升基高三尺創正廳及站廳各一所後列正樓廳東創思補廳并明樓各三間前時儀門一座凡七開門外左右迎賓館右立造冊局各一所又建龍亭庫土神祠及兩廊卷房從後站屋俱易其故址取欹毀疎曠及漫漶摧剝者葺飭改觀士民樂觀其盛翼如也既訖工屬予記其事云國朝宗彙鼎記略曰余來豐有熊坊墻者當贛吉水之衝歲時潰決大為民害予汎舟載石荷鍤楯而先之可幸至今無患建學立倉亦次第就舉而縣治之堂則戊子兵變所焚而壞者余欲構起之或止余曰工維難哉營室勞民盡以俟後人余曰不勞民營室何如於是難以一木一石煩我子弟而竣事堂既成豐楹而邃宇廣以密高以深聽治於斯用肅瞻視足蔽風雨且題之曰畏暑堂以識予志兼告

南昌府志

卷四

建置

天

後人焉士大夫稱引誘掖以子有類於古之名吏子謝不敏予所慕者蓋郭林宗一事昔者郭林宗每宿逆旅則掃除潔清後至者知為林宗宿處古人整理辦治之才不遺逆旅如此而今之人居家反如逆旅子固心耻而不欲道矣時維順治乙未年八月吉日

儒學署詳學校

縣丞署在縣署東乾隆三十二年縣丞黃汝源借廉修葺

四十二年縣丞何浩借廉復修縣志

主簿署在縣署內康熙間裁縣志

大江口巡檢署距縣三十里卽柿源巡檢乾隆二十九年

改設將舊署基變價建今署縣志

江潯巡檢署在二十七都今裁縣志

典史署在縣署東乾隆三十四年典史梁耀祖借廉修葺
四十五年典史楊式玉借廉重修縣志

進賢縣署在壇石山南宋崇寧二年創建紹興二十六年
縣令杜易重修乾道六年縣令張嘉謀建清陰樓景魏亭
望雲亭慶連堂元至元十二年燬於兵縣丞劉勇重建至
正七年縣令周天祥增葺明洪武間知縣李思中復建正
統中知縣張冲重葺正德二年知縣李學會以堂址卑隘
乃撤後堂為廳事嘉靖十四年知縣蘇志臯重修

國朝康熙二年知縣聶當世重建廳一重顏曰保赤堂饒宇棧

有記後雖屢加修葺而無增建縣志

南昌府志

卷四

建置

无

饒宇棧保赤堂記曰鍾陵據會省之東取道浙閩者類信
宿然後去故治象盛衰純疵常為四方觀瞻取法治故有
堂寢燬於兵踵事者乃析民居新之柱礎門屏取具而已
非能高明廣大有以壯望邑之觀也玉沙聶侯以名甲第
來尹吾邑凡事之有待新者無不畢新新學宮矣又飭城
垣新倉廩矣又建伍相國廟修羅溪矣又修郊圻之橋梁
進賢固瘠土侯休養生息舉公事之宜新宜飾者朝發夕
告成事乃顧瞻茲堂猶仍舊貫非所以作民敬而告以居
官之未可假易也於是以其年某月屯材命工不旋踵而
堂成取材自公民不知役然後知侯之所以安位者勤愛
民者仁而報

國者大也蓋上所示於下者莫如體而下所貢於上者莫如
情夫其體不崇其志不肅其情亦必不出也夫上所以治
下與下所以受治者率以為分耳以為分則惟我所命尊
嚴則尊嚴之苟簡而亦無不尊嚴之亦安所見民違順於
其間哉而黠者則有以窺之矣反覆隱藏即嚴刑峻罰而
情不出蓋不情生於不敬而不敬生於不肅居卑隘之堂
而希隆盛之理上所求於下者略下所報於上者微治固
然也侯精微博大事不可已必求安好而後止類如斯堂
然則斯堂也以為大令布德行惠之所而即億萬姓望恩

希澤喁喁待命之所以爲大令曲直得情之所而卽窮簷
婦子顛連觸目之所登斯堂者安得不瞿然深思暢然遠
覽哉侯仁政多端美不勝書而於斯堂顏之曰保赤又署
之曰居敬其意固侷侷乎遠且大矣因體侯之意備書之
以告後之官斯堂者聶侯諱當世號
二瞻湖廣監利縣人順治戊戌進士

儒學署詳學校

縣丞署在縣堂東乾隆四十五年縣丞王世鈞借廉修葺
縣志

主簿署在縣署西已廢 縣志

梅莊巡檢署在縣東北四十里雷家莊卽鄔子巡檢乾隆
三十年改兼管潤坡巡檢移駐梅莊舊有治東八十里之
潤坡巡檢署治北百里之龍山巡檢署治東百餘里鄔子

南昌府志

卷四 建置

三

巡檢署治東南四十里之桃花巡檢署缺裁署皆廢 縣志
典史署在主簿署南乾隆三十四年典史朱士任借廉修
理 縣志

河泊所署在鄔子口已廢 縣志

奉新縣署唐神龍二年新吳丞高良弼創建於馮水之北
宋嘉祐八年縣令丁餽修葺嘉靖間縣令張國均重建譙
樓 趙彥章有記 并建華豐亭於治右明初知縣王溥建縣

廳時無廨舍寄居民間洪武三年知縣余思濟創建十四
年知縣黃壽創建譙樓宣德間知縣璩鎮海重建正廳景
泰三年知縣劉讓重修成化十二年知縣岑方重建譙樓

張元禎有記 嘉靖元年知縣朱雲鳳於堂之東西創瓦房三十間十三年知縣胡億建通和堂萬曆二十一年知縣馮珽重修

國朝順治八年知縣王家禎修葺十七年知縣黃虞再重修康熙二年盡撤其舊而重修之建譙樓五十九年譙樓圯知縣鄭毓改為平屋乾隆四十一年知縣甯有誠借廉重修縣志

明趙彥章記曰重門鑿新肇自古初外建皋門實重侯國夫門之制尚矣奉新縣門南向自唐神龍遷縣以來未之有改也按續題名記政和中縣令上官允若始創樓又三年寢失舊規相傳於士人進取不利自此更五六十載閒進士登科題名僅三四而卿大夫賢人之書或比歲一獻開禧丁卯會主簿趙希義主學邑人士相率以告乃為請

南昌府志

卷四 建置

葉令君等撤舊屋視嚮一新之眾志翕然費不約而集工未輟葉代去陳令君堯仁踵其成終弗克備庚午秋尚書簡肅南城張公之孫國均字維之始至即病之顧力未遑也乃先修學校崇教事雖餼廩膳爨之未無不備飭明年俗益康政益暇乃率僚佐進諸生少長於學舉鄉飲酒禮遠近來觀者莫不興起又明年君報最將及瓜邑內長幼狀其治行詣府乞留者數百人一日論於眾曰縣樓更造既再竟成道旁之築今索然層屋而已耳如人形體略具而精神弗隨其何以聳民之視聽壯吾邑之形勢哉乃命日量功而落成之是科鄉薦四人半在郭郭待補太學者又五十人於戲豈君垂意作成天固相之誠若所謂興作之會契於陰陽之運土木之功應於福澤之數者歟時創樓之士咸以記請君曰此非某之功前人之功也然某得承茲邑值時和歲豐上官仁賢寬其成督得與諸君相從事否則財一掣書雖欲善得乎此又非前人之功上人之功也士若民喜曰此令君所以為君也使來俾彥章記張元禎記略曰奉新南昌大邑賦稅獄訟往往倍厥鄰境太平岑侯登賢科而來尹大邑既逾年凡事之當為者次第為之略盡斯固有為者矣矧年穀再登民安其業舉廢隆適其時歟邑治之南有鼓樓巋然高峙下通一道舊架

以木歲久傾圮俟出人過之一旦顧謂其僚曰環有百里間爲吾之民有耕者有織者有誦讀負版者又有奔走趨事不一其役在公者晨昏之際咸惟更鼓是聽斯樓更鼓之所在也有警乎民最切將使惰者勉勞者息蓄奸懷慝者畏縮而不敢肆何莫而非斯樓之功歟今若此弗稱具瞻乃出俸資之餘倡率僚屬壘石爲臺構重屋七間高二丈四尺有奇深三丈而廣倍之加半焉經始於成化丙申六月六日落成於丁酉三月之望既堅既完不美不麗壯乎舊觀而置更鼓焉邑之父老咸喜侯有成績礪石介詞訓嘉禾顧君望來徵予文以紀始末昔張希顏令萍鄉因更鼓分明獲知於范延嘗而受張忠定公之薦奉新去萍鄉不遠侯之才視希顏亦不讓政之善者固不止此當必能知而薦之有日則更鼓寧可以末節細務觀之而斯樓之作其可已哉侯名方字尙義先府君守潞州有能聲邑丞王君琛判部孫君知幕僚楊君忠司訓鄭君和顧君望馬君晉皆稱其官而樂助者也如者彥秀民董役輔義而凡有功於樓者亦皆次第名氏列諸碑末是爲記

儒學署詳學校

南昌府志

卷四

建置

三

縣丞署在縣治左宋紹興二十三年以尉廳爲之淳熙七年改建於治西北後燬明洪武三年仍遷入縣治之東縣志

國朝康熙二年始建於今所乾隆四十七年縣丞江瑤借廉修

葺縣志 新增

主簿署在縣治右已廢縣志

羅坊巡檢署在羅坊鎮明洪武元年巡檢王良玉創建宏

治閒通判應尹重修

國朝雍正十三年巡檢周篤生於原址復建舊規乾隆四十七

年巡檢馬厚培借廉修葺縣志

白沙塲頭巡檢署在富溪今廢

縣志

典史署在縣治右宋紹興閒改爲丞廳典史僦居民舍明
洪武三年仍遷入丞廳前

國朝康熙二年始建於今所乾隆四十三年典史錢元銓借廉

修葺

縣志

靖安縣署宋紹興閒縣令黃宗諤於廳事後創製錦堂幽
谷百花二亭後令楊億又構水木清華亭明洪武二年知
縣衡守敬重建十三年知縣朱宗晦作尊美堂

自有記正

統八年知縣金文英修葺成化十六年知縣劉芳建後堂
三閒曰復思堂宏治十六年知縣張伯祥立土地祠於儀

南昌府志

卷四

建置

三

門左正德六年燬於寇七年知縣萬士賢重建嘉靖元年
知縣葉金撤而新之正中牧愛堂後爲居仁由義堂三十
四年知縣周麟建後堂三閒曰思審堂三十九年主簿黃
應徵重修大堂顏曰公正廉明四十一年知縣趙公輔增
置吏舍廳後建堂曰慎思堂崇禎五年知縣章鳴謙顏大
堂曰君子堂

國朝康熙七年知縣任嘉瑞增修二十五年知縣鍾芝豫易後

堂曰君子大堂曰端本二十七年君子堂圯知縣高克藩

重修并建後樂亭

自有記

五十三年知縣李作仁重修後

堂乾隆十四年知縣馮渠重修大堂

自有記

增建棠蔭軒

枕繡亭十七年署縣朱堂修葺縣治內外自有記二十六

年李紀重修自有記三十九年知縣鄒朝陽借廉修理縣

志

明知縣朱宗晦尊美堂記曰子自為浙西經掖時與有志之士究論先聖為治之道未嘗不慨然興歎暨拜天子龍命來牧茲土得以行其所可為安敢不竭其忠誠以著學古入官之效署北舊有堂宇檐傾壁圯予始而修飾之以為燕處治事之所揭尊美二字以為修己之助邑有儒士進而言曰善哉令尹斯堂也靖安邑小而民瘠令尹以五美存諸心吾屬其有瘳乎昔趙宋時曹幽為簿於茲後至宰輔人以袞繡名其堂名則美矣然止於稱頌而已於國家何補楊億先生為令於茲構水木清華亭於邑治之東南豐先生來候云雖為千家邑正在清華閒至今以為名言景則美矣然止於適趣而已於政治何益孰若吾令尹尊五美之可尚也修己之學愛民之心具見於此子乃進生而語曰古之言治道之大且詳者無如孔子孔子歷述堯舜禹湯文武之政於魯論記者以答子張問政之目記

南昌府志

卷四 建置

書

於帝王之後然則為政之要孰有大於此者乎吾與二宰判簿長史皆筮仕於此發軔去柅能不以五美服膺哉姑以斯堂論之因其舊而修飾庶幾不傷民財惠可不費矣民少有勞或可無怨矣吾處是也期政平訟理得其所矣而不為貪吾臨於是務心平氣和信亦泰矣而不為驕或進縫掖討論治道或語吏胥推究事體或理訴牒審實獄情儼然以為民望吾之威庶不猛歟若是則吾與僚佐不負斯堂之美矣後之來者有見於此智者尊之昧者反之苟縱其利而費繁勞其民而怨積欲而貪者或匪仁慢而驕不克泰衣冠瞻視之正大之威筆楚蹀謬肆苛酷之猛政治其有不隙歟其或托溪山之美以曠懷覽風物之美而肆志則美其所美而非吾斯堂之美矣生再拜曰斯言也愷悌無窮之意也請記以為斯堂鑒予以生之請頗有符子浙西縫掖之意遂書以置諸壁間使後之君子有以知予之心

國朝

知縣高克藩後樂亭記曰廳事之後退食之所名曰君子其右曰尊美堂其西曰西園西園之後曰慎思堂中為明德堂東為東園園舊主簿隣堂曰袞繡為曹幽立也堂左有柳亭有曲沼堂右有廢亭予撤而新之顏曰後樂別為牆以閒之為門以通以繡谷桃源羅列若屏障蒼翠可掬

花木之屬有桃有柳有棗有楮有古樟一冬青一棟一橙
一有紫荊二桂樹二有老柏四新柏二有芙蓉有臘梅有
茶藤修篁繞徑雜木成林編竹爲籬刈草爲圃方幅咫尺
之區隱有城市山林之况可眺可吟可飲可射可乘風可
坐月可望積雪可覽雲霞變幻之氣蓋遊目騁懷時行物
生之致於此乎備之矣余考邑乘昔者黃宗諤合茲土於
後堂創製錦堂有百花幽谷二亭楊億治尉圃得會南豐
幽谷亭詩碑用其語構水木清華亭物換星移三亭之舊
址無從過而問焉大率名亭之意皆寓山水之樂爲耳目
遊觀之資而余易之以後樂者蓋不以山水之樂爲樂而
以一邑之樂爲樂亦不以一邑之樂爲樂而以天下之樂
爲樂後之者緩之也慎之也使人寓目警心思而得之也
此則余名亭之意是爲記

知縣馮渠重修大堂記略曰靖邑自南塘改場爲縣衙署
始建前明正德閒阨於兵燹嘉靖元年從而新之迄今幾
二百年守土者迭更而堂已垂圯矣余於丁卯春移官之
靖顧是堂卽思有以修葺之而蒞任以來催科撫字與夫
簿書期會之繁鹿鹿未就也今歲邑紳士咸願釀資從事
來請於余余轉請之上憲旋奉允行乃鳩工庀材八月興
工九月落成於是乎有輪奐之觀焉夫事難於圖厥始亦

南昌府志

卷四 建置

三

難於保厥終守土者知今日興作之勞而爲未雨綢繆之
計則永久可垂豈復有前此傾頽之患乎顧堂公堂也事
公事也昔鍾離意爲堂邑合出俸錢作屋民齋茹竹或持
材木爭赴趨作不日而成猶市屋耳今斯堂也諸紳士踴
躍赴公一若自爲築室計而不辭蓋其尊親之心蓄於中
斯急公之舉見諸事非然者其肯身任若此耶此與堂邑
之民何如也余不敏疎於治術然夙夜兢兢竊嘗以教養
是務所望吾民共敦孝悌忠信之行遠黨凌詬誅之風而
登斯堂也於飲射讀法而外跡罕至焉則士爲修士民爲
良民於以成仁讓之俗以永沐

聖朝

休養生息之思豈不休哉是役也成其美者貳尹姓司徒諱
宜樑水人監斯工者縣尉姓崔諱宏道大興人會計出入
以終其事者則邑紳士涂尙忠舒親生錢景福舒泮暨縣
民舒帝簡也例得并書

知縣朱堂記曰縣治內外均關政治不小也歲辛未夏五
余署靖篆其在署外者唯堂廨粗完固堂下清華亭則久
圯兩旁胥吏屋宇風雨無障蓋大門三楹棟且撓門外屏
牆逼於門木欄亦未建內則衰繡堂三閒僅存故址及舊
額常平倉五十餘座竝朽蠹不可支且夫蒞官者日當事
其事詎可從久暫起見哉余目擊諸廢墜不敢怠厥功爰

設方計先建清華亭以天語警心目次俾胥吏貯案牘各有所次繕大門次拓屏牆於

旌善揮惡二亭外規模既宏敬民望之心更肅然東西設木欄各顏其上曰新民曰保赤官箴亦揭於衆耳目閒矣

至起衰繡堂祠倉神舊倉在東北今移於西東爲積貯計久長於戲事關政治苟弗克勤則不敬莫大焉奚止曠乃

官歟因次其始末爲之記知縣李紀記略曰余蒞靖修舉廢墜悉出清俸鳩工於署

前起屏牆復漢唐郡縣眾思之體東西對峙圍以木柵榜曰志切興隆心懷撫字左右建申明輝惡亭二大門三楹

檐俯而卑無以飭觀撤而新之增以飛甍高其閤閤規制軒敞望若岑樓仍舊額而丹雘之儀門內戒石木牌仍用

南豐詩意表曰正在清華閒廳事俗皆曰大堂予取尙書義顏曰顧畏民崑題二聯於柱兩廊吏廡入隸役班房二

皆垂朽復新之內堂幕廳東西庫庖漏之所棟桷欹腐者易之牆垣頽塌者築之壁之剝落者巧以粉瓦縫之參差

者承以簞較舊制已煥然一新矣若其亭臺池沼蘄木葱蒨非不足以賞心而娛目余奉

命守茲土方將勤求治理圖報涓埃簿書鞅掌亦恐日不暇給又何敢寄情邱壑重勞土木之址興耶工既竣余因爲之

南昌府志

卷四

建置

三

記

儒學署詳學校 縣志

縣丞署康熙七年創建在縣署東偏乾隆四十四年縣丞

陳樹華借廉修理 縣志

主簿署在縣署之左卽宋袞繡堂已廢 縣志

典史署在縣堂之左乾隆四十四年典史曹廷棟借廉修

理 縣志

武寧縣署舊在高鄉西安里卽西安縣治唐景雲初東遷

於羅村饒灣之間天寶初縣令范建殊復遷於玉枕山前

卽今之縣治也宋時縣令呂晉夫於廳左建東軒紹興五

年縣令上官世美重建淳熙十年縣令洪檀復改東軒爲絃歌堂明洪武元年知縣但元行重建二年知縣盛文郁復建盛應期有記成化元年知縣余希賢建大堂十四年

知縣王僑建譙樓二十一年知縣洪琦修葺宏治年間知

縣林本淵毛騃復修嘉靖元年知縣陸浚梁稟復修二十

年知縣唐牧大加修治建保寧樓於署北中爲忠愛堂後

退食堂張寰有記萬曆四年知縣胡東陽修自有記七年

知縣高熾修葺三十一年知縣李呈芳建聞過軒三十七

年知縣周道重建大堂三十四年知縣張茂柏復修天啓

閒知縣徐士華修崇禎時知縣徐鳴時再修未幾燬於寇

南昌府志

卷四 建置

七

國朝順治四年知縣任天祚建正堂署縣事夏遵虞續建十四

年保寧樓燬十八年知縣馮其世卽保寧樓基建躋寧樓

湯民貞有記又重修縣署又築北辰樓盛彌願有記又修

理監獄張仲友有記雍正五年大堂圯知縣方聲亮重建

乾隆二年知縣吳之彥繼建縣志

明巡撫盛應期平政堂記曰山之巉曲奧僻者草木叢茂狐狸穴其中虎狼躍其上魑魅魍魎鬼怪雜獸咸於是萃焉蓋其幽足以潛形險足以固勢雖密設羅網其崎嶇陂側之陰適以資其號叫跳浪蕩然無所顧忌耳若夫中原曠野沃壤寬閒人烟繁盛林林芸芸各安其性雖狡獸怪物不待機張隱隱潛遁寂然無所施其技者何也其地平也故曰王道蕩蕩王道平平吾宗盛公文郁以明初尹武寧書其堂曰平政寧山邑山峻而逼民稱難治公宰之若無爲迄今百餘年民猶思之其有得於是者與噫世之谿刻峭厲急於自用卒無成效者聞公風其亦可以少愧矣

江西巡撫都察院吳江族人盛應期書

明參政張寰保寧樓記曰嘉靖辛丑秋上海唐君世惠以國學典簿擢武寧環山以為縣壤接楚尾民多流移時竊發為盜而城故築自唐縣令范建殊廢久元至正間賊大肆害宏治初復然知縣毛騃增築之正德開華林瑪瑙之亂再擾長樂上南官吏皆散徙去君廉得其故笑曰寇至則去邑誰與保夫安不忘危臣子職守也事苟無備而一日有警則符籍帑藏將安所歸乃與民謀修四門完飭鞏固又構層樓於縣廨後以為保民計不三月告成邑人創見怵慶且觴而落之斯樓也玉枕伊山時其陰白崖柳峯當其陽天馬金雞羅屏鍾鼎拱列左右俯視修江以達支流委蛇縈帶而四時景狀雲蒸霏靄商變無端勝斯萃焉幸方際昇平挾僚佐招文學以時觀遊節勞逸優游於其閒唐君顧獨為身是謀哉期與嗣為邑者圖永久而符籍帑藏將於是歸庶幾上下倚賴有以相保詩云君子所依小人所腓斯樓之謂也遂名之曰保寧識者躋之君乃述其事屬余記予唯世之有司率多以所寓為傳舍閒一葺治不過粉飾耳目苟安旦夕而鮮有加意於民者唐君獨能深謀遠慮為一邑安危計建此鴻圖以貽將來有必保吾民寧吾民而後已焉其用心果何如哉後之登斯樓者

南昌府志

卷四 建置

美

其亦可以知唐君之吏治矣故為之記以銘諸石云知縣胡東陽題名碑記曰題名記者何記官之名氏也我明稽古設官邑有令有丞有簿有尉凡以為民也居官任職者思朝廷所以設官之意俾民愛之如父母則秩無尊卑任無久暫唯其無鰥於職守而止不然豈其使漫然肆於民上以尸位苟祿已哉邑建於唐舊未有記元以前湮沒無徵不復識已明興自但元行以下五十二人余悉記而勒之堂左序其鄉籍紀其官階使後之覽者得以指而議之曰某也廉某也貪某也民之慈父某也邑之鷹鷂直道昭於久遠法戒貽於嗣續凡蒞茲土者觸目警心監今視昔得不悚然自惕乎夫人聞譽則喜詈之以惡則怒其性然也而况一命以上受爵於君食祿於民其忍恫淫自即匪彝而不係民以久遠之思哉余與若僚旦晝在覽亦庸惕其鰥曠云

國朝

教諭湯民貞保寧樓記曰武寧舊衙退食堂後有保寧樓形家者云以迎龍脈而壯地勢也無何災於順治十四年丁酉逮康熙四年乙巳馮侯其世建樓明年三月樓成顏之曰躋寧有取於攸躋攸寧之義焉侯蒞政以來不事敲撲與民休息如治苗然護其良而去其害灌溉滋長以待有成蓋五年於茲矣侯以風雅自贍優游有餘登是樓也

太清涵空爽氣飛來北彌王枕西接九宮南望柳山東眺
吳峯足以收一邑之勝而侯若欲然不足當夫土膏膏潤
萬草舍華則思幽村僻壤有難於舉趾者乎曰何以省之
又或晴霞曉燦綠陰芳穠則思町畦溝洫其有暑雨之吝
嘆摧之歎乎又何以慰之及露團雲斂修江練明亦已西
疇告成其有滯穗不沾授衣無計者乎吾何以助之至夫
霜風凜栗雪花飄空時或物窮力絀將無有茅簷不葺婦
子靡寧者乎其又何以周之時序變遷觸目警心其閒往
復圖維有必登諸衽席而後厭者庶幾攸躋攸寧之意與
侯皇然曰是吾心也而未逮願以俟後之君子
盛彌願北辰樓記曰縣治城之北徑通與瑞山藪綿連時
竊發為盜藏奸叵測而北門為之蔽向闖逆寇武謀攻於
北累晝夜輜櫓器械畢張駭人耳目城內率丁壯相拒卒
不能下馮侯詢往事乃相地勢為治安計去北門透而西
計十餘丈築臺臺可遠望為樓曰北辰蓋一邑之樞紐於
是乎屬焉嘗讀左傳僖公五年正月辛亥朔日南至公既
視朔遂登樓以望而書禮也凡分至啓閉必書雲物為備
故也侯之建是樓也其知所務矣雖然城為外備而民為
根本吾不為之所信無備矣苟兵至而民逝則昧於其本
也故春秋書浚洙書城中邱重民力也養民之道在愛民

南昌府志

卷四 建置

堯

力民力足則生養遂教化行風俗美內有所恃而外有所
備唯良有司是望耳吾侯愛民如子而以其餘閒為一邑
久安之計不勤民力不費民財巍然莫此巨觀固非尋常
興築而為無益之舉者願得於羣士中而請誌一言以為
異日牧民者法

張仲友修理監獄記曰邑之有囹圄聖王不得已設之雖
禁奸暴亦必哀矜勿喜之意寓乎其間曲為軫恤而後天
地生物之仁庶幾和維於無窮是故天官以貫索虛盈規
政治乖和井偶然也吾邑地瘠民貧物力相絀逋賦相仍
羈禁日煩充斥淹滯往往有之雲夢馮侯甫下車閱及監
獄惻然曰皆吾赤子也何忍坐繫至此取爰書出入輕重
條其可宥者聞於上盡釋之時辛丑臘改歲時也又念一
二畱獄者既失保萃之歡復無飲食度歲之資錫以酒米
使得安息人人歡忭獄故瓦柄摧折牆垣圯頽其地壅滯
泥汚積闕不疏惡穢叢鬱致生災禍乃鳩工度材一完葺
之廢者以理滯者以通而獄大治焉既成邑父老子弟屬
子曰侯仁我民若此其能默然耶蓋文以誦之子感而言
曰侯之大有造於武也能育物也能廣恩也古人有關雎
麟趾之意而可以行周官之法度若侯者慈祥豈弟獄雖
設而期民之不人也將見囹圄空虛國土蕭然而侯之功

德流於史冊者方大書特書之不暇又豈予文所能竟哉姑爲之記以塞其意云
儒學署詳學校

縣丞署舊在縣署左乾隆二十二年移駐年豐鄉木高地

方建署

縣志

主簿署今裁

縣志

高平巡檢署在年豐鄉雍正三年設

縣志

典史署在縣丞舊署南

縣志

都司署在縣治東北卽布政分司舊址明崇禎時建

守備署

國朝康熙四年守備房光先增修五十六年守備扈養肅建客

南昌府志

卷四

建置

罕

廳雍正十一年改爲都司署乾隆八年都司李大成重建

十六年都司楊炤建校射堂

縣志

寧州署卽唐宋分寧縣治在鳳凰山南一里唐貞元十五

年始創宋元祐閒縣令蕭從建肥民求瘼靖共三堂

黃庭

堅有銘

宣和閒縣令韓駒建醒心邀月問春三亭建炎閒

陞義軍尋復爲縣景定閒兵燬縣令任滄復建元陞爲州

遷治爲武寧縣明洪武二年改州爲縣知縣項中宣於州

治舊基創建成化十年知縣蕭光甫撤而新之

錢溥寧有

記宏治十六年御史林俊具奏改縣爲州十七年知州葉

天爵重修顏其堂曰明通公溥

楊廉陳瀾皆有記

十八年

復增修之正德二年知縣沈暕修葺萬曆五年知州石漢
增建鐘鼓樓後燬於寇萬曆二十三年知州方沆重修大
門儀門自有記

國朝康熙五年知州徐永齡捐修其後知州任暄猷祖維衡相
繼改葺雍正九年知州李化龍倡捐重修州志

宋黃庭堅三堂銘曰茂宰蕭公來撫我民自初迄茲惠政
日新父母慈之知其苦樂吏瘦民肥猶求其瘼靖其在堂
敬畏在廷賓禮士子有涓有涇我銘三堂式頌式勸繼續
公者無墜斯憲
明錢溥寧記曰是時成化十年夏莆田蕭光甫來知寧縣
事寧卽唐析武寧八鄉地爲分寧縣宋因之元至元間始
陞爲寧州明洪武初改寧縣仍州治其堂以歲久漫漶
將及於毀光甫顧而歎曰縣仍州堂僭也將毀弗治慢也
僭則官昧其制慢則民易其令官肆於上民忽於下而欲
縣治得乎縣本禮樂法度之所苟僭且慢而欲移易其風

南昌府志 卷四 建置 聖

俗安定其民志可乎卽有事於興舉然縣隸南昌府府隸
藩臬上下相距幾四百里民散處山谷間傲義而面仁加
以旱蝗相仍盜賊竊發於其境居民流徙而之他者衆乃
曰民吾赤子也忍視其墊溺而不恤耶盜亦民也可縱其
剽掠而不知所戢耶遂大申約束明教化振興廢休聞四
起盜乃斂跡無譁民亦轉緣於南畝災肯自息歲稱有年
光甫始自喜曰是可理吾室矣達於所轄撤其故宇因材
於山範甃於治役民於隙而室遂完美入其門其門洞開
知其心之無壅蔽也至其庭其庭如水知其訟之清簡也
攝而升堂堂改塗以墨安其分也居高聽卑知其情之下
達也靜聞堂上之琴美蓋邑中之錦知其化之自近以及
遠也會子固曰分寧人勤生而嗇施薄義而好爭以今觀
之民尚嗇施而好爭乎是化蓋有待於光甫光甫由癸酉
貢生潼川州學正陞知寧縣以憂改任將滿去父老千餘
詣藩臬乞畱以慰民望蓋賢令也其縣學訓導上虞余良
具實來請記遂書此俾刻宣於縣之壁
揚廉明通公溥堂記曰分寧陞州冬十一月婺源葉君天
爵來爲守握章之閱月卽謀所以新州之治者蓋視事之
堂棟宇朽蠹將撓儀門廊廡苟且相附位置不分而頽敗
特甚鼓樓處西偏出入必繫折於是卽其偏者鼎而新之

離而正之卽其朽蠹頹敗者否而革之可而因之勞費未半而成功倍之與州而同一維新焉州之新者何分寧吾南昌所屬也其名因革靡常唐德宗時始析武寧八鄉地分而爲縣曰分寧者蓋取諸此也宋因之元至元間廼躋縣而爲州明洪武二年改爲縣至宏治十六年復爲州前之州與縣固各有義不暇及今之州也以其地巖險西北諸山迤邐數百里連峯接岫豪強倚以武斷急之則挺變都御史林君俊巡視吾土深爲之慮用知府祝君瀚言以爲地大物衆所臨乎上者非隆其秩無以彈壓之遂以州請詔可之卽張置官吏而州焉然豈特州與州治之新而已哉葉君之甫至也卽以分寧之舊俗與所以圖乎新者召父老於庭與之約復備以榜之通衢用徧以告其州之人而其舉錯設施固莫非與民圖新者其意以朝廷之新乎州非新乎州而已且非新乎州之治而已欲新乎政也欲新乎民也葉君於新州之先後本末可謂知所兼舉矣是役也州同黃君輔州判陳君興皆協心戮力而於民之知義而可任者俾分董之如堂如門如廊廡則以陳澍如鼓樓則以查仲春陳潛劉雅才劉季芳張文華工旣畢葉君具顛末遣生員陳由仁來徵記昔程子因其徒孟厚不治一室而曰洒掃得潔淨莫更快意朱子見造居有門橫

南昌府志

卷四 建置

聖

縱巷出者曰直是公道橫則與世相均而亦最病夫牆傾壁倒而不理會者葉君之新州治也又有得於程朱二先生之遺意矣矧官府之次舍等級降殺截然攸寓固於私第有弗類哉葉君以名進士嘗令崇仁明察剛毅廉公有聲聞四馳其政已成而擢於此然則家詩書戶禮樂聞一州而絃歌以還分寧之舊不端有賴哉孟子曰子力行之亦以新子之國廉於葉君亦云故爲記以及之陳瀾明通公溥堂記曰寧州古分寧邑也邑茲土以治惟訟繁政劇之是病邑者難之都使者習常重改弊則日深益稱難治維宏治癸亥都憲林公奉命蒞茲省加惠元元尤篤意於寧遂率其監司郡守官會於寧考不治狀乃知其縣秩旣卑無以攝伏豪右而宰復不得其人法雖存無所用之計非隆其秩廉其才以彈壓之不可用是走驛使以狀聞於朝遂革縣而升之州乃訪旁郡良吏以政績著者得葉侯於崇仁舉以爲州守而委之新政焉侯下車彰善瘴惡軌民於法朞年而政成弊蠲利興賦增訟簡而寧遂爲江右之治郡侯旣新其人又新其州治之舊額顧退處之堂棟宇將撓殆不可事事侯曰昔先正濂溪周子策仕爲分寧主簿斯堂蓋先生所嘗憩焉者在寧人固宜有甘棠遺愛之思在郡守不可無緇衣好賢之志必在利

民非徒作者故記之以爲寧人告俾來者知有所自且有
所法
知州方沆記略曰分寧之爲郡介萬山中夙號未易治屬
頃歲薦飢賦積逋而囂訟繁興主者聽甚高而弗察逮追
呼而潮汐遞至官與民交病蚤夜皇皇幸脫身去卽解宇
掌故窳墜因循不佞性最慙受事以來稍撰次寧志缺之
目擊門外內傾頽闌入者無禁旌善申明二亭亦漸就圯
狂狴湫隘風雨不蔽去歲遂釀出柙之變中心焦勞苦不
能一朝居者廼請兩憲道府諸大夫發藏金三千有奇不
足則佐以餘俸檄杉市巡檢徐汝楫督老人李廷震查國
利撤而葺之義民陳德平德讚山有材平其直以授匠氏
肇於萬厯乙未初夏乙卯訖於季夏辛未幸而落成嗟夫
不佞誠慙豈欲爲吏長子孫哉巡檢拮据效勞老人若諸
匠作用命競勸抑豈博名高而竊餘潤邪蓋不有廢者孰
思與興不有勞者孰有其逸不佞縱秋風起而思葺鱸乎
後之君子倘尋繹端緒官署吏解次第鼎新俾寧之民日
漸涵於政平訟簡之化庸詎知非不佞劍首一映力也巡
檢請一言紀歲月共事者州同知謝詵判官柯熹年吏目
注世祐八疊巡司巡檢
薛佑范模法得備書

南昌奇

卷四

建置

三

州儒學署詳學校

州同署在大堂東

州志

州判署在大堂西

州志

吏目署在州同署前

州志

排埠塘巡檢署在仁鄉雍正六年建

州志

八疊嶺巡檢署在州南奉鄉明正統四年與奉新新昌合

建宏治間葉天爵重修後裁

國朝雍正六年復設

州志

杉市巡檢署在崇鄉乾隆三十年裁

州志

銅鼓營同知署雍正四年建移瑞州府同知駐銅鼓營

據

冊新增

銅鼓營都司署即原守備署明萬曆四年建

國朝乾隆四十五年借廉修理 州志

移駐銅鼓瑞州千總署雍正六年奉文動帑建 州志

銅鼓把總署雍正六年建 州志

按銅鼓營同知本瑞州府所轄惟駐劄之地半屬寧州而該處倉糧專歸南昌府稽覈其所設都司等弁皆隸南昌故附載於此



南昌府志

卷四 建置

四

南昌府志卷四終